

Ama' yej kijkuiloj San Pablo iga tokniwan yej chantitokej altepe' Roma Romanos

Pablo kijkuilowiliá tokniwan yej kitokaj Cristo yej ichamej Roma

¹ Nej niPablo, nikchiwa ken netekimaka Jesucristo.* Dios nenotza' iwán netapejpen iga manimochiwa iyapóstol† iga manikpowa ye'noticiaj yej tasalvarowa.

² Dios ipan profetajme‡ ikyay tamatiltij iga asis inin ye'noticiaj, ijkón ijkulijto' ipan itájtól Dios, ³ ompa pan ye'noticiaj tajtowa de toTēko Jesucristo yej Dios iPiltzín, yej naceroko pan ipilówampa ipilowan el rey David. ⁴ Iwán Dios kijtoj iga Jesucristo yéj iPiltzín iwán kimá' poder, ken iyEspíritoj Dios tanextilij iga ki-ojpa-ixitij kan miktoya. ⁵ Jesucristo netapejpen iga manimochiwa iyapóstol iga manía ipan nochi paismej iga makicredokan, iwán makichiwakan nochi ken Dios kineki. ⁶ Iwán amejemenwa' in sekin de inomej yej Dios kinotza' iga ximochiwakan itatki Jesucristo.

⁷ Nimitzijkuilowiliáj amonochin amejemen yej anchantitokej ipan weyi-altepe' Roma. Amejemen yej Dios mitzneki, iwán mitztapejpenkej

* **1:1** 1:1 Xikita glosario "Cristo". † **1:1** 1:1 Xikita glosario "Apóstol". ‡ **1:2** 1:2 Xikita glosario "Profeta".

iga ximochiwakan itatki. Dios yej toTaj wan toTeko Jesucristo mamitzmakakan yej yekti iwán makichíwa iga xonokan tamelá.

Pablo paxqlojneki Roma

⁸ Achto nikmaka gracias Dios ipan itoká' Jesucristo iga nochi amejemen, iga noyan mojtowa iga anmoconfiarojtokej ipan Cristo. ⁹ Dios kita iga ayí' nikajtewa iga niktajtaniliá iga mamitzpalewikan amejemen. Nikyolmaka iga nitekipanowa iga Dios iga nikpojtó' ye'noticiaj de iPiltzin. ¹⁰ Nochipa niktajtaniliá Dios siga yéj kineki, wel mania manimitzpaxalowilitij. ¹¹ Iga pox nimitzitasnekij iga wel manimitzpalewikan pan Dios itájtól, iga máj ximoconfiarokan pan Dios; ¹² ken tikijtowaj, matimosepan-palewikan iga majya sej matimoconfiarokan ipan toTeko.

¹³ Nokniwan, xikmatikan iga mia' vej nikne' manimitzitatij, e' este inán awelsan nia. Niajneki pan amoaltepe' Roma iga manikpowa itájtól Dios iga makicredokan mia', kensan nikchij kajkan nikpowilij sekin yej ayéj judiyojmej. ¹⁴ Nikmachiliá ken nikdeberowa Dios, inón iga manikuiguili Dios itájtól nochi gente, yej griegojmej iwán yej ayéj, yej tejté iteki o ayá'. ¹⁵ Inán pox nikyolmakato' iga manikpowati ye'noticiaj iga nochi yej anchantitokej Roma.

Itájtól Dios tasalvarowa

¹⁶ Ayá' nipinawa iga nikpowa ye'noticiaj, iga inón tájtól ipoder Dios iga kisalvarowa nochi yej yéj kicredowa; achto judiyojmej iwán no yej ayéj. ¹⁷ Ipan inín ye'noticiaj tenextiliá iga san

ticreḏowaj iwán timoconfiarowaj ipan Cristo, teye'ita Dios. Kan ijkuijto' ijkín kijtowa: “Yej kichíwa ken kineki Dios, Dios kiyé'ita iwán yawi onoti nochipa wán yéj.”

Tonochimej ayompa tikchijtokej

¹⁸ Inón iga Dios kinextiá desde ipan cielo iga kikuesowilijto' inomej yej kichijtokej yej ayékti, iga ijkón kichíwaj, kitzakuiliáj iga sekin makixmatikan Dios. ¹⁹ Yejemej kimatij yej wel momati de Dios, iga Dios imatika kinextilíjkeja; ²⁰ puej Dios awel tikitaj, e' wel tikixmatij pan yej kichij. Este kuá'san Dios kichij inín tajli, ompa monojma-ita' iga yéj nokta Dios iwán nochi wel kichíwa; inón iga yejemej awel mo-tajtowiliskej. ²¹ Puej malej iga kimatiayaj iga ono' Dios, e' ayá' kiweyimatiltijkej ken Dios, niga kimakakej gracias. Majwa' kejlámikij yej ajayékti, iwán yolpoliwikej ken se yej ayá' ye'tajlámiki. ²² Kijtowaj iga nochi kimatij, e' xetoktikej. ²³ Kikajtejkej yej mela'Dios, yej nochi wel kichíwa, wán ayi'pa miki, iga kiweyimatiltiáj idolojmej yej tamachíwal. Ono' ídolo yej tacháj ken taga', e' taga' míkisan, ono' ídolo yej tacháj ken totó', ono' ídolo yej tacháj ken yej moelwawatatzowaj iwán ono' ídolo yej tacháj ken yolkamej yej nawí iyikxi.

²⁴ Inón iga Dios kisenkokajtej inomej iga makichíwakan yej pox ayékti, yej kejlámikij iga makichíwakan. Iwán yejemensan mosepanchíwilijkej yej poxsan ajayékti yej este tipinawaj iga tikitaj. ²⁵ Inomej ayá' kikuikej iyojwi Dios, majwa' mokajkayajkej ipan yej ayéj

ye'ojti iga kiweyimatiltijkej yej Diospa kichij, en lugar iga makiweyimatiltikan Dios, yej nochi kichij, yej kajasi iga mamoweyimatilti nochipa. Ijkónyawa'.

²⁶ Inón iga Dios kisenkokajtej inomej iga makichiwakan ken kineki iyalmajmej, iga siwatkej ayo' motekayaj iwán taga', iga motekáyaja iwán yej siwa' nō iga kichiwaj yej ayekti. ²⁷ Iwán ijkonsan nō tajtaga' kikajtejkej iga motekaj iwán siwa', iga motekaj iwán itaga-ikniwan iga kichiwaj yej ayekti. Poxsan moelewijkej se' iwán se', iwán Dios kicastigarōj inomej iga mosepanchiwiliáj yej ayekti.

²⁸ Iwán yejemen ay'ya kinekikej nité wan Dios. Dios kisenkokajtej inomej iga makichiwakan kensan kineki iyalmajmej iga makichiwakan yej ayekti. ²⁹ Nochipa kichiwaj nochi yej ayekti, masij wan yej ayá' iwán namiktitokej, motekaj iwán itaga-iknin, kipoxnekij tomin, namolnemij, ta-ixitaj, tamiktiáj, mokuesowaj, takajkawawaj iwán keklamikij iga kichiwaj yej ayekti. ³⁰ Tapopowaj, tapantiáj, kijiya Dios, taajawaj, moweyimatij, mokichmatij, pox welitij iga kichiwaj yej ayekti, akichiwaj ken kitekimakaj itajmej. ³¹ Xetoktikej, kijtowaj tejté iwán akichiwaj, ayéj te-ijiknimej, poxsamej iwán ayá' ta-ikneliáj. ³² Yejemej kimatij yej Dios tatekimaka iga mamochiwa, kimatij iga yej kichiwaj yej ayekti, kajasi iga mamikikan, e' malej ijkón, majsan kichiwaj, wan este kiye'itaj kua' kitaj agaj kichywa yej ayekti.

2

Dios tajuzgarowa ken kajasi

¹ Kuá' tikipliá se' iga kichij yej ayékti, mogánajsan timotikomota iga tej no tikchijto' ijkón ken se' nemi tikjuzgarowa. Inón iga ay'ya wel timotajtowilij, a'san nesi in tej. ² E' tikmatij iga Dios kichíwa ken kajasi kuá' kijuzgarowa inomej yej ijkón kichíwaj. ³ Tej yej tikipliá sekin iga kichíwaj yej ayékti iwán tej no tikchíwa ijkón, tej an tikjotowa anka wel timiyanas iyixtaj Dios kuá' tajuzgaroj ⁴ ¿Anka tikijiya yej Dios mitzmaka iga Dios pox tachokiliá wan ayá' nimanín kuesiwi? ¿Ix atikmati iga pox ta-icneliá iga mitznexiliá iga xikajtewa iga tikchíwa yej ayékti? ⁵ E' tej timoyoltakuawiliá, iwán ayá' tikneki tikajtewa iga tikchíwa yej ayékti. Inón iga nemi tikuesowa Dios iwán mogánajsan nemi timochíwiliá iga mamitzjuzgarokan kuá' keman Dios wí' iga tacastigaroki ken kajasi. ⁶ Iwán yawi kixtawati sejsé kensan kichij. ⁷ Ono' yej nochipa kitemowaj iga kichíwaj yej yékti iga Dios makiye'ita. Dios yawi kitaliti inomej iga iyixtaj maye'onokan nochipa iwán nochipa onoskej wan yéj. ⁸ E' Dios kuesiwi iwán yawi kicastigaroti yej ayompa kichijtokej iwán iga ayá' kinekij makichíwakán ken Dios kineki, majwa' kichíwaj yej ayékti. ⁹ Yawij kiknochíwatij iwán yawij moyolmiktítij nochi yej kichíwaj yej ayékti; achto judiyojmej iwán no yej ayéj. ¹⁰ Dios yawi kitaliti iga iyixtaj maye'onokan, iwán mapaktokan wan maonokan tamelá nochi

yej kichiwaj yej yekti; achto judiyojmej iwán no yej ayéj.

¹¹ Iga Dios ayá' sesan kiye'ita. ¹² Inochi yej kichiwaj yej ayekti, yej ayá' kixmatikej iley Moisés ijkón mikiskej; iwán yej kixmatikej iley Moisés iwán kichiwaskew yej ayekti; iga inón ley yawij kijuzgarotij. ¹³ Iga Dios awel kiye'itas inomej yej iga san kikakij iley Moisés, yéj kiye'ita yej kichiwaj ken kijtowa inón ley. ¹⁴ Kuá' inomej gente yej ayéj judiyojmej, kichiwaj ken kijtowa la ley, malej iga ayá' kixmatij inón ley. Yejémensan iseltimej kichiwaj ken la ley tatekimaka; ¹⁵ iga ken nemij kinexiáj iga ijkuiijto' se ley ipan iyalmajmej, iwán momachiliáj siga kichijkej yej yekti o ayekti. ¹⁶ Inín mochibas inón día kuá' Dios kimakas iga Jesucristo makijuzgaro inewi yej kichtakachijkej nochi tokniwan, kensan kijtowa ye'noticiaj yej nej nikpowa.

Judiyojmej iwán iley Moisés

¹⁷ Tej yej timokichmati iga tijudiyoj, iwán tikchiwa ken kijtowa iley Moisés, iwán timoweyimati iga tiye'ono' iwán Dios. ¹⁸ Tej yej tikijtowa iga tikmati katiá yej Diospa kineki iga mamochiwa, iwán la ley mitznexiá iga wel tikye'tapejpena katiapa yej yekti. ¹⁹ Timomachiliá iga wel tikye'ojkuiltiá yej ayá' ye'nemij iwán ken tiktawiá yej onokej ken kan takomichkan. ²⁰ Tikijtowa iga wel tikmachiá yej ayá' kixmatij itájtól Dios, iwán yej némi-o' pewa kixmati iyojwi Dios, iga san tikpiá la ley iwán timomachiliá iga tej yej wel titamachiá nokta. ²¹ Tej yej tikmachiá se',

¿ix ayá' achto tej ximomachti? Tej titamachtiá iga amo matachtekilo, ¿in tej, te íga titachteki? ²² Tej tikijtowa iga ayēkti iga yej namiktito' mayawi wān se', ¿in tej, te íga ijkón tikchīwa? Siga tej tikijiya idolojmej, ¿te iga titachteki ipan itiōpamej idolojmej? ²³ Timoweyimati iga tikpiá la ley, e' tikajawilmati Dios iga ayá' tikchīwa ken tatekimaka la ley. ²⁴ Yej ígawa' ijkín kijtowa kan ijkuilijto': "Amotechko amejemen iga yej ayéj judiyojmej kipopowaj Dios."

²⁵ Mela'wa' siga timocircuncidarowa,* mitz-palewiá achi, e' siga tikchíjto'san ken tatekimaka iley Moisés; e' siga ayá' tikchīwa nochi, ken tikita ayá' timocircuncidaroj. ²⁶ Iwán siga yej ayá' ono' circuncidado makichīwa ken tatekimaka la ley, inón mo-itas ken tikita yej mocircuncidaroj, malej iga ayá' ono' circuncidado. ²⁷ Iwán yej ayá' ono' circuncidado, iga ayá' tekto' ikajlo', iwán makichīwa ken tatekimaka la ley, yéj yawi mitzjuzgaroti iga ayá' tikchīwa ken kijtowaj la ley, malej iga tikpiá la ley iwán tonon' circuncidado. ²⁸ Se ayéj judío iga san ijkón nesí, malej se mamocircuncidaro, iga mamoteki ipan ikajlo'. ²⁹ Majwa' yej mela'judiyoj kicredowa Dios este ipan iyalmaj, wān yej ono' circuncidado ayejsan ipan ikajlo' sino que nō este ipan iyalmaj, iwán inón awel kichīwa la ley, sino que iyEspíritoj Dios. Yej ijkón ono', Dios kiyē'ita malej iga tajtaga' ayá' kiyē'itaj.

* **2:25** 2:25 Xikita glosario "Circuncisión".

3

¹ ¿Te motaniliá siga se majudiyoj?, ¿o te motaniliá siga se maono circuncidado?*

² Poxsan, iwán ono' mia' yej wel nimitznextiliá iga ijkón nokta; achto nimitzijliáj iga Dios kiyē'ita' judiyojmej iwán kimá' iley. ³ ¿Te kichij siga sekin de yejemej kikajtewaj iga moconfiarowaj ipan Dios? ¿Ix iga inonsan Dios kikajtewas iga kichīwas yej kijtoj? ⁴ ¡Ayéj ijkón! Majwa' Dios kichīwa nochi kensan kijtoj, malej iga nochi tajtaga' matakajkayawakan; iga kan ijkuilijto' itájtōl Dios kijtowa:

Pan motájtōl neſis iga ompay ken tikijtowa, iwán tiktanilij yej mitztelwiskej.

⁵ Kua' tikchīwaj yej ayekti, tiknextiáj iga Dios kajasi makuesiwi iwán matecastigarō. ¿Ix wel iga inón tikijtowaj iga Dios kichīwa yej ayekti kua' tēcastigarowa? (Nemi nitajtowa ken se taga' tajlamiki.) ⁶ ¡Ayéj ijkón! Siga Dios katka kichīwaya yej ayekti, ¿kén wel kijuzgarōj nochi yej onokej ipan inín tajli?

⁷ Ono' sekin nō yej ayá' yē'tajlamikij yej kijtowaj: “Kua' nej nitakajkayawa, máj neſi iga kajasi iga Dios mamoweyimatilti iga yéj ayí' takajkayawa. Wel an nikijtowa, ¿te iga Dios mane-ítao' ken se yej ayekti kichīwa?” ⁸ Siga ijkón, ¿te iga ayá' tikijtoskej iga matikchīwakan yej ayekti iga mawiki yej yekti? Ken nejemej sekin nepantiáj iga ijkón nitamachtiáj. Inomej yej ijkón nepantiáj, kajasi iga Dios makicastigarō.

Ateyi nisé yej mayē'nemi

* **3:1** 3:1 Xikita glosario “Circuncisión”.

⁹ ¿Kéntaj? ¿Ix tejemen judiyojmej yej máj tiye'nemij que yejemej? ¡Ayéj ijkón! Nim-itznex̄tilíjkeja iga kensan judiyojmej kensan yej ayéj, nō kichijtokej yej ayēkti. ¹⁰ Kān ijkūilijto' itájtōl Dios kijtowa:

Ateyi nisé yej ye'nemi, nisé nokta;

¹¹ Ateyi ni agaj yej kimatisneki yej yekti, niga yej kitēmowa Dios iga makitoka iyojwi.

¹² Inewi k̄iskej ipan ye'ojti, iwán inochi momela'pojpolojkej.

Ateyi yej kich̄iwa yej yekti, ateyi nisé nokta.

¹³ Itoskamej ken tikita animajxapo' yej tētapojto';

iga ompa k̄isaj ken iga takajkayawaj.

Itajtōlmej yej k̄isaj ipan itēmej kualo ken tikita kowā' iyayo.

¹⁴ San kijtojtokej yej ajayēkti iwán san tayōlmiktijtokej.

¹⁵ Niman̄insan kuesiwij este wel tamiktiáj;

¹⁶ san kān iga yawij, tapolowaj iwán tayōlmiktiáj,

¹⁷ iwán ayá' k̄ixmatij ojti yej tēnextiliá iga matonokān tamelá.

¹⁸ Ni al̄in ayá' kimajmawiliáj Dios.

¹⁹ Nochi in̄in ijkūilijto' ipan itájtōl Dios. Tikmatij iga yej kipiáj iley Dios makich̄iwakān ken kijtowa. E', como ayá' kich̄iwaj, ayagaj wel kijtowa iga ye'nemi, iga ipan in̄in ley neši iga tonoch̄in ayompa tinemij wān kajasi iga Dios matēcastigaro. ²⁰ Ayagaj wel ye'ono iyixtaj Dios iga san kich̄iwa ken kijtowa la ley, iga la ley tēnextiliajsan iga tonoch̄in tikch̄iwaj yej ayēkti.

Se wel momanawia iga san moconfiarowa ipan Jesucristo

²¹ E' inán Dios tenextiliá ken iga wel tiye'onoj iyixtaj yéj, ayéj iga tikchiwaj ken kijtowa la ley; inín wel timomachtiáj kan ijkuilijto' pan la ley iwán kan kijuilojkej profetajmej.

²² Yej moconfiarowa ipan Jesucristo, Dios nochi kiye'ita, a'san nesi yej kicredowaj ipan yéj.

²³ Tonochin tikchijkej yej ayékti iwán inón iga timoyokatijtokej wan Dios.

²⁴ E' Dios kiyokachij iga matiye'onokan iyixtaj iga san techokiliá. Te-iknelij iwán temanawij iga Jesucristo migui' iga tejemej.

²⁵ Dios kititan iPiltzin iga mikiko; kitoyaj iyesyo iga totechko iga wel mateperdonarowili yej tikchijkej yej ayékti. Inón teperdonarowiliá iga san ticredowaj ipan Cristo. Ijkón Dios kichij yej yékti iga kiperdonarowaj yej ikyay la gente kichijkej yej ayékti.

²⁶ Inán iga Cristo migui' tenextiliá iga nochi yej ayékti kichijkej la gente, kiperdonarowilijkeja. Iwán momela'mati iga ijkonya nokta ken Dios tajuzgarowa, iga ayo' kejlanto' yej ayékti yej kichijkej yej inán moconfiarowaj ipan Jesucristo.

²⁷ ¿Kántaj kawí iga pox timokichmatij iyixtaj Dios? Támi'ya. ¿Te iga an? Ayéj iga tikchijkej ken kijtowa la ley, majwa' iga ticredójkejsan.

²⁸ Ijkón tikawij; se wel ye'ono iyixtaj Dios iga kicredowa Jesucristo, ayéj iga kichiwa ken kijtowa la ley.

²⁹ ¿In Dios, ix iDiössan judiyojmej? ¿Ix ayéj iDios nō yej ayéj judiyojmej? Kena, yejemen nō.

³⁰ Iga Dios sesan ono' iwán kichiwas iga nochi maye'onokan iyixtaj yéj iga san moconfiarowaj

ípan, até kichij siga judiyojmej o ayéj. ³¹ Iga timoconfiarowaj ipan Cristo, ¿ix ay'ya te iteki la ley? ¡Ayéj ijkón! Majwa' tiknextiáj te nokta iteki la ley.

4

Matimixkuítikan pan yej kichij Abraham

¹ ¿Inán te tikijoskej, te motanilij to-ikyapatajwewej Abraham? ² Siga Dios kiye'ita' Abraham iga san yej kichij, kajasi iga mamoweyimati, e' Abraham ayí' moweyimati' iyixtaj Dios. ³ Puej ¿te kijtowa kan ijkuilijto' itájtól Dios? “Dios kiye'ita' Abraham ken se yej akichij yej ayékti iga moconfiaroj ipan Dios.” ⁴ E' siga se tekipanowa, itomín ayá' san kipetzmakaj, majwa' kajasi iga makimakakan iga tatánija. ⁵ E' siga agaj yej niga te kichiwa iga maye'nemi iwán kicredowa ipan Dios iga yéj wel kiye'itas, Dios kiye'ita iga san kicredowa ipan yéj. ⁶ Ijkonsan no kijtowa David iga mapaki yej Dios kiye'ita, malej iga ayá' kichij nité iga makiye'ita. ⁷ David kijtoj:

Yolpaktókeja yej Dios kiperdonarowílija yej kichijkej yej ayékti iwán kelkawílija yej ayompa kichijkej.

⁸ Yolpacto' taga' yej toTeko ay'ya kejlámikiliá inón yej ayékti kichij.

⁹ ¿Ix yolpaktokej inómejsan yej onokej circuncidado, o no yolpaktokej yej ayá' onokej circuncidado? Tikitákeja iga Dios kiye'ita' Abraham ken se yej akichij yej ayékti iga moconfiarojsan ipan Dios. ¹⁰ E' ¿keman ijkón kita'? ¿Ix

kuꝗ' Abraham onoyay circuncidado, o kuꝗ' aya? Áchtosan, kuꝗ' aya mocircuncidaꝗowa. ¹¹ Iwán Abraham mocircuncidaꝗoj iga manesi iga Dios ki-omemáwija ken se yej ye'nemi, iga san moconfiaꝗoj ipan Dios. Ijkón iga Abraham mochij ken tətajwéj de inochi yej moconfiaꝗowaj ipan Dios, malej iga ayá' onokej circuncidado; ijkón Dios kita nochi inomej ken kuꝗ' ayá' kichijkej yej ayékti. ¹² Abraham nō tətajwewej de inomej yej onokej circuncidado, e' yej nō moconfiaꝗowaj kensan totajwewej Abraham moconfiaꝗoj kuꝗ' aya onoya circuncidado.

Dios kichíwa yej kijtoj iga se moconfiaꝗówasan ipan

¹³ Pues Dios kijlij Abraham iwán ipilówampa ipilowán iga yejemen yawij kimakatij nochi tajli iga mamochíwa itatkimej. E' inín mochij ayéj iga Abraham kichijtoya ken kijtowa la ley, sino que iga moconfiaꝗoj ipan Dios, iwán Dios kita' Abraham kenkuꝗ' ayá' kichij nité yej ayékti. ¹⁴ Siga katka yejsan kichíwaj ken kijtowa la ley kimakaskej yej Dios kijtoj, báldejsan iga timoconfiaꝗowaj ipan Dios. Iwán ay'ya valeroj yej Dios kijtoj iga temakas. ¹⁵ Iga atikchíwaj ken kijtowa la ley, kajasi iga matecastigaꝗokan; e' kan ateyi la ley, ayagaj itechko iga akichíwa ken tatekimaka la ley.

¹⁶ Inón iga yej Dios kijlij Abraham iga kimakaskej nochi ipilowán ipilówampa, san kipetzmakaskej iga Abraham moconfiaꝗoj ipan yéj. Ijkón nochi ipilowán ipilówampa Abraham kimatij iga kimakaskej yej Dios kijtoj; ayéj iga

yejsan kichiwaj ken kijtowa la ley, sino que no iga nochi yej kicredowaj ken kicredoj Abraham. Yej mochij tetaj iga nochi tejemej. ¹⁷ Itajtol Dios tajtowa de Abraham: “Tej nimitztalij iga itetajwewej mia' naciomej.” Inin itajtol, Dios kimá' Abraham iga Abraham kicredoj ipan Dios yej wel ki-ojpa-ixitiá yej miktokej, iwán iga itajtol kichíwa yej aya teyi.

¹⁸ Malej iga nesiá iga isiwa' akitaya ipiltzin, Abraham kicredoj iga mochiwas nochi yej Dios kijlij. Ijkón iga mochij “tetaj iga mia' paismej”, ijkón ken Dios kijlij: “Poxsan piwis ipilowan mopilowan.” ¹⁹ Abraham ayá' kikajtey iga moconfiaroj ipan Dios, malej iga kipiayay ken cien años, iwán yéj kimatiá iga yéj iwán Sara ayo' wejka iga mikiaja wan poxsan yolejkej iga makipiakan ipilowan. ²⁰ Yéj ayá' kijtoj iga akicredowa yej Dios kijlij, majwa' moconfiaroj poxsan ipan itajtol Dios iwán kiweyimatiltij, ²¹ kimela'mati iga Dios wel kichíwa inewi yej kijlij. ²² Inón iga Dios kita' Abraham ken se yej ye'nemi iyixtaj iga moconfiaroj ipan yéj.

²³ Iwán ayejsan iga Abraham inin mo-ijkuiloj iga Dios kita' ken se yej ye'nemi iyixtaj; ²⁴ sino iga tejemen no. Puej Dios no te-ita ken yej tiye'nemij iyixtaj iga timoconfiarowaj ipan yéj, yej ki-ojpa-ixitij Jesús toTeko. ²⁵ Dios kine' iga makimiktikan Jesús iga yej tikchijkej yej ayekti, iwán ki-ojpa-ixitij iga matiye'onokan iyixtaj yéj.

5

Wel tiye'onokej iyixtaj Dios

¹ Inán welja teye'ita Dios iga timoconfiarowaj ipan yéj, tonókeja tamelá wán yéj iga yej kichij toTéko Jesucristo iga tejemen. ² Inán iga timoconfiarojkej ipan Cristo, tikmatij iga Dios te-ikneliá iga welya tiye'onoj iyixtaj. Iwán tipakij iga tikmatij iga wi' día kuá' tikitaskkej yej yekti yej Dios temakas. ³ Iwán ayejsan iga inón tipaktokej, sino que nõ tipakij kuá' te-iknochiwaj, iga tikmatij iga kuá' te-iknochiwaj ompa timomachtiaj ken iga wel matikijyowikan kuá' te-iknochiwaj. ⁴ Iwán iga tikijyowiáj kuá' te-iknochiwaj, Dios teye'ita, iwán siga teye'ita Dios, wel tikmatij iga keman tonoskej íwan. ⁵ Iwán iga tikmatij iga keman tonoskej íwan, ayá' tipinawaj iga tikmatij iga temá' iyEspíritoj yej tenextiliá ken iga yéj tepoxchokiliá.

⁶ Kuá' awel timomanawiyaj toganaj, íkuá'wa' in Cristo migui' iga tejemen yej tikchiwaj yej ayekti. ⁷ Ayí' agaj kiyolmaka iga mamiki iga se', niga wel miki iga se yej ye'nemi; anka wel ono se yej wel mamiki iga se yej mela'ye'nemi nokta. ⁸ E', Dios tenextiliá iga tepoxchokiliá iga Cristo migui' iga tejemen, malej iga tikchijtokej yej ayekti. ⁹ Inán Dios teye'ita iga Cristo kitoyaj iyeyo kuá' migui' iga tejemen; majya sej Cristo wel temanawij kuá' Dios kuesiwis wán kicas-tigaroj yej ayompa nemij. ¹⁰ Siga kuá' tejemej aya teye'itaya Dios, Cristo kichij iga teye'itaya iga mi' iga tejemej, kuantí máj iga inán teye'itaya, nõ tesalvarowa iga Cristo ojpa-isa' sej. ¹¹ Ayejsan iga inón, sino que nõ tipaktokej ipan Dios iga ticredowaj pan toTéko Jesucristo, iwán iga Cristo

kichij iga matonokan tamelá wan Dios.

Adán iwán Cristo

¹² Ijkón inán, iga itechko se taga' yej akichij ken Dios kine', ómpaya pewa' iga mochiwa yej ayekti ipan inín tajli, inón iga mikilo, iwán inán nochi miki iga nochi kichiwaj yej ayekti. ¹³ Áchtosan kua' aya onoya ley, mochijtoyay yej ayekti ipan inín tajli; e' kua' ateyi ley, ayagaj wel kitelwiá iga kichijto' yej ayekti. ¹⁴ Desde iga onoya Adán este iga Dios kimá' ley in Moisés, mikikej nochi gente. Mikikej malej iga ayá' kiyokachijkej yej Dios kijtoj iga amo mamochiwa; Adán, kena, kiyokachij yej Dios kijtoj iga amo mamochiwa.

Wel mojtowa iga Adán achi ijkómpasan ken Cristo. ¹⁵ E' yej kichij Adán awel tikijtowaj iga ijkómpasan iwán inón yej Dios tepetzmakokawij. Iga itechko Adán mia' mikikej, e' majya sej Jesucristo iselti kichij iga Dios mateye'ita iwán temakokawij iga tesalvarowa. ¹⁶ Inón yej Adán kichij yej ayekti, awel tikijtowa iga ijkómpasan ken imakoka Dios yej temaka iga tesalvarowa. Iga se yej Adán kichij yej ayekti, mojtowa iga kajasi iga nochi mamocastigaro; e' imakoka Dios kichijwa iga wel teye'ita, malej iga tikchijkej mia' yej ayekti ¹⁷ Puej siga itechko sesan taga' yej kichij yej ayekti, nochi gente miki; iga yej kichij se' taga' yej itoka' Jesucristo, majya sej wel tepalewiá iga ayí' timikiskej iga Dios te-ikneliá.

¹⁸ Ijkón ken itechko Adán iga kichij yej ayekti, nochi gente mikij, ijkonsan no iga Cristo yej kichij yej pox yekti, kichij iga Dios makiye'ita nochi gente wan maonokan iwán nochipa.

¹⁹ Ken tikijtowaj igasan se taga' ayá' tacredoj iga kichij yej ayekti, nochi kimopa'; ijkonsan no iga se taga' yej itoka' Jesús tacredoj, kichij iga Dios makiye'ita pox miakejmej.

²⁰ Dios kimá' iley Moisés iga matikmatikan iga tikchiwaj yej ayekti. E' malej iga pox nesi iga mochiwa yej ayekti, majya sej Dios kinextij iga te-ikneliá. ²¹ Ijkón iga nochi tejemen tikchiwaj yej ayekti, iwán inón iga nochi timikij; e' inán iga Dios pox te-ikneliá iwán teye'ita iga timoconfiarowaj pan toTeko Jesucristo, nochipa tonoskej wan yéj.

6

Tisenmikikeja iwán Cristo, ijkonsan no iwán tisen-ojpa-isaskej

¹ ¿Te tikijoskej? ¿Ix tikteki'chijoskej yej ayekti iga Dios majo' mateperdonaro? ² ¡Ayá! Tejemen ken kuá' timikikeja iga tikajtéjkeja iga tiktekichiwaj yej ayekti; ¿kén weljo' matikchijtokansan yej ayekti? ³ ¿Ix ayá' ankimatij iga yej timobautizarojkej* iga ticredojkej ipan Cristo Jesús, no ken kuá' tisenmikikeja iwán? ⁴ Iga kuá' timobautizarojkej, íkuá' timosentokkej iwán. Ijkón ken toTaj ki-ojpa-ixitij Cristo iga iweyi poder, ijkón inán teojpa-ixitij iga matiye'nemikanya pan iyojwi.

⁵ Siga kuá' timobautizarojkej, tisenmikikeja iwán Cristo, ijkonsan no iwán tisen-ojpa-isaskej. ⁶ Tikmatij iga to-ikyapanemilis moclavaroj wan Cristo ipan cruz, iga inón yej teyoltilanaya iga

* **6:3** 6:3 Xikita glosario "Bautizar".

matikchiwakan yej ayekti mamikiya iga ayo' maj matikchijtokan yej ayekti. ⁷ Yej mi'ya, ayo' kichywa yej ayekti. ⁸ Siga tisenmikikeja iwán Cristo, tikmatij no iga tonoskej iwán. ⁹ Tikmatij iga kua' Cristo ojpa-isa'ya kan miktoya, ayo' sej mikis nikeman. ¹⁰ Cristo migui' sesan vej iga makiperdonaro nochi yej mochiwa yej ayekti; e' inán iga sej isato', kichijto' ken Dios kineki. ¹¹ Ijkonan no amejemen ximomachilikan kenkua' anmiktokeja iga ayo' wel ankichiwaj yej ayekti, e' xisatokan iga xikchiwakan ken kineki Dios, iga ansetitokej wan Cristo Jesús yej toTeko.

¹² Amocuerpoj keman mikis, e' inán mitzteki-makasnekij iga xikchiwakan yej ayekti, inón iga amo ximoyolyamanakan iga xikchiwakan yej ayekti ken mitzyoltilanaj amocuerpoj. ¹³ Ni alín amocuerpoj amo makichywa yej ayekti. Majwa' xikchiwakan yej Dios kineki iga manesi iga anmikikeja wan an-ojpa-isa'keja sej. Ximomakakan iga nochi amocuerpoj makichywa yej yekti ken Dios kineki. ¹⁴ Ijkon ay'ya wel mitztekimakaj amocuerpoj iga xikchiwakan yej ayekti iga ayo' mitztekimakatokej la ley, sino que inán amonokej iga Dios mitzikneliáj.

Matimixkuítikan ipan toknimej yej tekoyojkej, yej kijliáj esclavo†

¹⁵ ¿Kén tikijoskej? ¿Ix tiawij tikchiwatij yej ayekti iga ay'ya tetekimaka la ley, iwán iga san Dios te-ikneliá? ¡Ayéj ijkon! ¹⁶ Amejemen ankimatij siga ankitemowaj iga agaj mamochiwa

† **6:14** 6:14 Xikita glosario "Esclavo".

amoteko, amonoskej ken iyesc̣lavojmej iwán ankichiwaskkej ken yéj mitztekimakaj; siga mitztekimakaj iga xikchíwakan yej ayékti, anmikiskej. E' siga ankichiwaskkej iga Dios maono iga amoTéko, ankichíwaj ken yéj kiye'ita. ¹⁷ Nikmaka gracias Dios, malej iga ikyay ankitekichijtoyaj yej ayékti, e' inán ankimela'credójeja iga inochi amoalmaj kensan mitzmachtijkej. ¹⁸ Inán ken kuá' anxitomíkeja iga ay'ya ankichijtokej yej ayékti, inán ankichíwaja ken mitztekimakaj amoTéko Dios. ¹⁹ (Nimitzijkuilowiliáj ijkín iga ximixkuítikan ipan toknimej yej esclavojmej iga amejemen máj wel xikentenderokan nochi.) Ijkón ken ikya ankiyolmakakej iga ankichijkej kuajkuantas yej ayékti iga amocuerpojmej, ijkón inán ximomakakan iga xiye'nemikan, iwán xonokan petz san iga Dios.

²⁰ Kuá' amejemen an-ilpitóyajo' iga nochipa ankichijtoyaj yej ayékti, ayá' katka ankichíwayaj ken kineki Dios; ²¹ e' ¿te anmotanilijkej ipan yej ikya ankichijkej, yej inán mitzpinajtiáj? Nité. Yej nemij ipan inón ojti, yawij mikitij. ²² E' inán ayo' an-ilpitokej iga ayo' ankitekichijtokej yej ayékti, majwa' ankichíwaja ken kineki Dios. Inín sí, mitzpalewiáj iga inán annemiskej ken kineki Dios, wan después nochipay amonoskej iwán Dios. ²³ Yej kichíwa yej ayékti, motaniliá iga mamiki, e' yej temakokatiá Dios, inón iga nochipa matonokan iwán iga tisetitójeja wan Cristo Jesús yej toTéko.

Mixkuñtilo ipan yej namiktitokej

¹ Nokniwan yej ankixmatij la ley, ankimátija iga la ley kimandarowa se mej iga isátogo'.

² Wel timixkuñtiáj ipan se siwa' yej namiktito'; la ley kijtowa iga awel yawi wan se' taga' mej ónogo' iwewej, e' siga miki iwewej, la ley kixitoma iga wel mamonamikti wan se'.

³ Siga se siwa' kitoka se' taga' mej isátogo' iwewej, kijliskej iga najnamolnemi; e' siga miki iwewej, siwa' xitomi de la ley, iwán wel monamiktiá iwán se' taga' iwán ayá' mojtowa iga najnamolnemi.

⁴ Ijkonсан no amejemen nokniwan, ken ansenmikikeja wan Cristo, ay' mitzjuzgarowaj la ley. Inán amejemen itatki se'ya, inonwa' toTeko yej ojpa-isa' kan miktoya, inón iga matikchijtokanya ken Dios kineki. ⁵ Mej tikchijtoyaj yej ayompa kensan kinekiá toalmaj, la ley tetajlantiko iga máj tikelewijkej yej ayekti iga matikchiwakan iga tocuerpoj, iwán ijkón tewiga' kan matimikikan.

⁶ E' inán iga tisenmikikej wan Cristo, ay'ya tejuzgarowa la ley. Inán timoyolpatákeja iwán tikchijwaj ken kineki iyEspíritoj Dios, iga ay'ya tonokej ipan imá' inón ley yej ikyay ijkulijto'.

Ipan nej chantito' yej ayekti

⁷ ¿Tetaj tikijoskej inán? ¿Ix ayekti in la ley? ¡Ayá! Ayéj ijkón. E' nej ayá' katka nikixmatia yej ayekti siga ayéj iga la ley. Nej ayá' nikmatia siga ayekti iga manikpiasneki yej ayéj notatki siga la ley ayá' ijkín kijtowaya: “Amo xikpiasneki yej ayéj motatki.” ⁸ E' el pecado momatij de la ley, iwán itechko yej tatekimaka la ley, pan nej kixitij

iga manikyolmaka iga manikchiwa nochi yej ajayekti. Siga ateyi la ley, el pecado ken mikto' iga até wel kichiwa. ⁹ Ikyá nej aya nikixmatiá la ley wān nitawelonoya; e' kuá' nikixmati' la ley, ken kixitij iga manikchiwa yej ayekti, iwán nimigui' iga neyokatij wān Dios. ¹⁰ Iwán nikasi' iga inonsan ley yej katka manemaka vida, majwa' nemiktij iga neyokatij wān Dios. ¹¹ Iga el pecado momatij de yej tatekimaka la ley, nekajkayaj iwán iga inonsan yej tatekimaka, nemiktij iga neyokatij wān Dios.

¹² Inán tikjtowaj iga la ley nokta wāljaj de Dios, iwán nochi yej tatekimaka pox yekti, Dios kiye'ita wān tanextiliá ken iga se maye'nemi. ¹³ La ley yekti, e' inantaj, ¿ix iga itechko la ley iga nimigui'? ¡Ayéj ijkón! Nej notechko iga nimigui' iga nikchij yej ayekti kuá' la ley nenextilij yej yekti; iwán ijkón iga ipan la ley nesí iga yej ayekti nikchiwa, poxsay sej ayekti nesí.

¹⁴ Tikmatij iga la ley wí' de Dios; e' nej ninakayoj wān nochipa neyoltilana iga nikchiwa yej ayekti. ¹⁵ Nej anikojasi yej nikchiwa, iga ayá' nikchiwa yej nikneki, majwa' nikchiwa yej nikijiya. ¹⁶ Malej iga ayá' nikchiwa yej yekti yej nikchijasneki, kena, nikmati iga pox yekti la ley. ¹⁷ Ijkón ayo' nej yej nikchiwa, sino que yej ayekti yej chantito' pan noalmaj neyoltilana. ¹⁸ Iwán nej nikmati iga ayá' chantito' yej yekti pan noalmaj, iga nochipa neyoltilana iga manikchiwa yej ayekti; puej nej nikchijasneki yej yekti, e' awel nikchiwa. ¹⁹ Anikchiwa yej yekti ken nikneki, majwa' nikchíto'san yej anikneki.

²⁰ Iwán siga nikchíwa yej ayá' nikneki, ayo' nej yej nikchíwa, sino que yej ayękti yej chantito' pan noalmaj.

²¹ Ijkón inán nikmati; malej iga nej nikneko' manikchíwa yej yekti, nej nikchíto'san yej ayękti. ²² Ipan noalmaj nikye'ita iley Dios; ²³ e' nikita iga chantito' ipan nej ken tejté yej netekimakato' yej akineki manikchíwa ken nikelamiki; inonwa' yej ayękti yej chantito' pan nej yej nepresojwijo'.

²⁴ ¡Nimoknomati ken nono'! ¿A' nemanawij de inín nocuerpoj yej ken míkto'ya? ²⁵ ¡Gracias nikmaka Dios iga toTęko Jesucristo nemanawij!

Ijkón inán, nikneki iga manikchíwa yej kijtowa iley Dios, e' ipan nocuerpoj ono' se' ken tejté yej netekimakato' iwán nechíwaltiá yej ayękti.

8

IyEspíritoj Dios teojmaka

¹ Inón iga, Dios ayí' kicastigaroj yej setitokej wán Cristo Jesús, yej ayo' nemij ken yejemej kinekij, sino que nemij ken kineki iyEspíritoj Dios. ² Iga tisetitokej wán Cristo Jesús, iyEspíritoj Dios temaka vida iga ay'ya tikchíwaj yej ayękti; tesalvaroj iwán ay'ya tetekimaka inón ley yej kijtowa iga timikiskej iga tikchíwaj yej ayękti. ³ Iga Dios kichij iga tejemej yej ileypa Moisés awel kichíwaya. Inón ley awel tepalewiá iga tikchíwaj yej tatekimaka, iga nochipa toalmaj kineki matikchíwakan yej ayękti. Dios kititan iPiltzın yej mochij taga' yej nesiá kensan tejemej,

yej ayękti tikchıwaj,* iga mamiki iga totechko. Dios ipan icuerpoj iPiltzin kipoloj nochi yej ayękti tikchıwaj. ⁴ Inón kichij iga tejemej wel matikchıwakan ken kijtowa la ley, puej ayo' tikchijtokej ken tiknekij tejemej sino que ken kineki iyEspırıtorej Dios.

⁵ Puej yej kichijtokej yej kiyoltilantokej yej ayękti, kejlantokej iga kichıwaj ken yej yejemejpa kinekij; e' yej kichijtokej ken kineki iyEspırıtorej Dios, kejlantokej iga kichıwaj ken kineki Dios. ⁶ Siga matikchijtokan ken teyoltilana yej ayękti, inón temiktiá, e' siga matikchijtokan ken kineki el Espırıtito Santo, nochipa tonoskej wan Dios iwán tonoskej tamelá. ⁷ Iga yej kejlámikijsan yej ayękti, inómejwa' kijiya Dios; iga akichıwaj ken kineki iley Dios, niga welitij kichıwaj. ⁸ Inón iga, yej kichijtokej yej kiyoltilanaj yej ayękti, Dios awel kiyę'ita.

⁹ E' amejemen ay'ya ankichijtokej ken mitzyoltilanaj yej ayękti, sino ken kineki iyEspırıtorej Dios, iyEspırıtorej Dios ono' ipan amejemen. Yej ayá' kipiá iyEspırıtorej Cristo, inón ayéj de Cristo. ¹⁰ Malej iga amocuerpoj mikis iga ankichıwaj yej ayękti, e' siga Cristo chantito' pan amejemej, amoespırıtorej isato' iga anyę'onokej iyixtaj Dios. ¹¹ Iwán siga chantito' pan amejemej iyEspırıtorej Dios, inón yej ki-ojpa-ixitij Jesús kan miktoya; inonsan nō Dios yej ki-ojpa-ixitij, nō mitzojpa-ixitıskej iga iyEspırıtorej yej chantito' pan amejemej.

* **8:3** 8:3 Ayéj iga Jesús kichij yej ayękti; Heb 4:15 kijtowa iga Jesús ayı' kichij yej ayękti.

12 Ijkón nokniwan, inán Dios kineki iga matikchiwakan ayéj ken toalmaj kineki iga matikchiwakan yej ayekti. 13 Siga amejemen an-kichijtokej ken amoalmaj kineki iga xikchiwakan yej ayekti, anyawij anmikitij iga anyokatitoskej de Dios; e' siga iyEspíritoj Dios mitzkawaltiáj iga ayo' xikchiwakan yej ayekti, nochipa amonoskej wan Dios.

14 Ipilowan Dios momakaj iga kitokaj ken kinextiliá iyEspíritoj Dios. 15 Puej iyEspíritoj Dios yej mitzmakakej, ayéj se espíritu yej mitzesclavojtialiáj iga sej ximajmawikan, sino que Espíritu yej kichiwa iga ximochiwakan ipilowan Dios. Iwán inín Espíritu kichiwa iga matikijlikan Dios: ¡Nopáj! 16 Ininsan Espíritu mosetiliá iwán toespíritoj iwán kijtowa iga tejemen ipilowanya Dios. 17 Iwán iga tejemen ipilowan Dios, kajasi iga nō matemakakan yej itatki Dios, yej kijtoj iga temakas, iwán tosentatki mochibas wan Cristo, siga inán iwán tiksensufrirowaj, wel nō tonoskej ipan cielo kan ono' yéj.

18 Puej nikmati iga inán tejemej yej tik-sufrirowaj, ni alín ayá' kaxiliá iwán inón, kuá' keman tisen-onoskej wan Jesús. 19 Inochi yej ono', yej kichij Dios kichixtokej iga magui' maásiya inón día kuá' Dios kichibas iga manesi aja'yéj ipilowan. 20 Iga inochi yej ono', yej kichij Dios yéj kijtoj iga amo maye'onokan,† ayéj iga kinekij, sino iga Dios ijkón kijtoj; e' weljo' sej keman moye'talij 21 iga nochi yej kichij Dios ay' yawij mikitij niga palaniskej, wan paktoskej nō

† 8:20 8:20 Gn 3:17

kensan ipilowaŋ Dios. ²² Tikmatij iga inán nochi yej Dios kichij tenatokej iwán kimachiliáj ken se siwa' yej pilkualoto' iga taonoltiá. ²³ Iwán ayejsan nochi yej Dios kichij yej kualotokej, sino que tejemen no, e' tikpiaja iyEspíritoj Dios yej achto temá'. Iwán tikmatij iga inón ki-tojneki iga temákasó' máj. Tikmachiliáj iga poxsan tikualotokej, iwán tikchixtokej iga keman techiwas ipilowaŋ Dios, íkua' timomachiliskej íjkanya iga tikpiaskej sé'paya tocuerpoj. ²⁴ Iga tikchixtokej Dios tikmatij iga timomanawíjkejya; e' siga se kichixto' yej kítzto'pa, inón ayo' kichixto'. Yej se kítzto'ya, ¿téjaso' iga m-kichixto? ²⁵ E' siga tikchixtokej yej aya tikitaj, melá'wa' iga atisiawij iga tikchixtokej.

²⁶ Ijkonsan no iyEspíritoj Dios tepalewiá kua' timosemakasnékija. Iga kua' titajtowaj waŋ Dios ayá' tikmatij te tiktajtaniliáj, e' iyEspíritoj Dios tetajtowiliá iyixtaj Dios, te ken ténapa iga kijtowa yej tejemej atikojasij kén tikijtowaj. ²⁷ Iwán Dios yej kixmati te tikejlantokej, kimati te nemi kijtowa iyEspíritoj Dios; iga iyEspíritoj Dios kitajtowiliá yej kicredowaj Dios, íjkón iga Dios kineki iga maye'onokan.

Nochipa tiktaniáj iga Cristo tepalewiá

²⁸ Tikmatij iga Dios tekipanowa iga nochi maye'kisa inomej yej kichokiliáj, inomej yej Dios kitapejpen iga mamochiwa ken yéj nochipa kejlanto'. ²⁹ Iga yejemej yej Dios ikayay kixmati', áchtoya no kitapejpen iga mamochiwakan kensan Jesucristo yej iPiltzín Dios, iga Jesucristo mamochiwa tekoko pan nochi tokniwaŋ. ³⁰ Iwán

yej desde áchtoya Dios kitapejpen, kinotza' nō, iwán yej kinotza', nō ki-omemawij, iwán yej ki-omemawij, nō kitalij iga maono itenoj yéj.

³¹ Inán, ¿te tikijoskej de inín? Siga Dios de tejémempa, ¿a'yéj yej wel tēchīwilij yej ayekti?

³² Dios kine' iga mamiki iPiltzīn iga nochi teje-mej; ¿kén iga ayá' yawi nō temakati nochi yej yéj kipiá?

³³ ¿A'yéj wel kitelwīj yej Dios kitapejpen? Ayagaj, iga Dioswa' in yej kijtowa a'yéj ye'nemi; ³⁴ ¿A'yéj wel tēcastigarōj? Ni agaj, iga Crīstojwa' in yej migui' iga tejemen, ayejsan iga inón, sino que ojpa-isa' iwán ono' iladoj iye'ma' Dios iga tētajtowilijto'.

³⁵ ¿A'yéj wel kikawaltij iga Cristo matechokili? Ayagaj, niga nité wel kikawaltij iga Cristo matechokili. ¿Ix wel kuá' tēcastigarowaj, o kuá' tejté teyolmiktijto', iwán kuá' tētemojtinemij iga matecastigarokan, o kuá' apistaj, o kuá' ayo' tikpiáj totzótzol, o kuá' temiktijnekij? ³⁶ Ken kijtowa kan ijkuilijto':

Iga san nimitztokaj, nochipa nemiktijnekij.

Ne-itaj ken borregojmej‡ yej yawij kimiktijij.

³⁷ E' ipan nochi inín, nochipa tiye'kisaj iga tepalewiá Cristo yej tēchokiliá. ³⁸ Inán

nikmela'mati iga ateyi nité yej wel kikawaltij iga Dios matechokili. Niga matemiktikan, niga kuá' tisatokej, niga angelejmej,§ niga Tzitzimi' iyangelejmej, niga yej ono' inán, niga yej wí'o',

³⁹ niga yej ajko ono', niga yej ono' taltampa. Nité yej Dios kichij, awel kikawaltia' iga Dios

‡ **8:36** 8:36 Xikita glosario "Borrego". § **8:38** 8:38 Xikita glosario "Ángel".

matenekí ken yéj tenex̄tilij ipan Cristo Jesús yej toTeko.

9

Ken iga Dios kitapejpen la gente de Israel

¹ Nej niktoka Cristo, iwán iyEspíritoj Dios nenex̄tiliá pan noalmaj iwán ne-ijliá iga ayá' nemi nitakajkayawa; nemi nimitzijliáj nokta iga ² poxsan nimoknoṃati, iwán nochipa kualoto' noalmaj. ³ Niknekiá katka manikpalewikan nokniwan israelitajmej yej de nejémempasan. Este katka Dios ayo' maneye'ita iwán manikajtewa iyojwi Cristo, e' siga katka inón kipalewiayaj yejemej iga makina'techokan Dios. ⁴ Yejemej israelitajmej, iwán Dios kitapejpen iga mamochiwakan ipilowan. Dios kinex̄tilij ipoder iga onoya iwamej kuá' kichij pacto iwán yejemej. Dios kimá' iley Moisés. Dios kinex̄tilij ken iga makiweyimatiṭikan kuá' monechkowaj tiopan, iwán kijlij yej yawi kimakatij. ⁵ Yejemej ipilowan ipilowampa to-ikyapatajwewetkej, ipan inomej walaṃ Cristo, iwán yéj Dios yej kimandarowa nochi, nochipa mamoweyimatiṭi. Ijkónyawa'.

⁶ Ayéj iga Dios ayá' kichij ken kijlij israelitajmej; iga ayéj nochi gente yej israelitajmej imela'pilowan Dios, iga ayá' nochi moconfiarowaj ipan Dios ken iyikyapatajwewejmej Israel* yej nō itoká' Jacob. ⁷ Niga nochi ipilowan Abraham ayéj nochi imela'pilowan; sino que Dios ijkín kijlij: “Petz mopiltzın Isaac yawi

* **9:6** 9:6 Israel; taga' yej nō itoká' Jacob.

kipiwiti mopilowan.”† 8 Inin te-ijlijneki iga ijkón ken Isaac naceroj iga Abraham moconfiaroj ipan yey kijtoj Dios; tejemej nõ ipilowan Dios ayéj iga tejemej ipilowan Abraham, majwa' iga timoconfiarowaj ipan yey kijtoj Dios. 9 Dios kijlij Abraham yey yawi mochiwati: “Se xiwi' sej niwi', iwán íkuá' Sara kítasya se ipiltzin.”‡

Dios wel kichíwa ken kiyé'ita

10 Amo xikelkawakan yey mochiw wan kuatejmej yey ipilowan Rebeca wan Isaac yey to-ikyapatajwewej; 11-13 kuá' aya katka onoyaj kuatejmej, niga kichíkaja yey yekti niga yey ayekti, e' Dios kijlij Rebeca: “Yey tekoko yawi kichíwati ken kineki tetzoyo'.” Inón nõ senyawí wan se' kan ijkulijto', kijtowa: “Nikne' Jacob, e' Esaú nikijiya'.” Ijkón nesi iga Dios wel kitapejpena ken kineki, ayéj iga agaj kichíwa tejté, sino que iga Dios kiyokanotza'.§

14 Inán ¿té tikijoskej? In Dios, ¿ix kichíwa yey ayekti? ¡Ayéj ijkón! 15 Iga Dios kijlij Moisés: “Nia nikchokilíti yey nej nikneki manikikneli, iwán nikiknelij yey nej nia nikiknelíti.”*

16 Inón iga ayejsan iga agaj makineki, niga mamoteki'topewa iga makalaki, tájma'wa' Dios yey yéj kikneliá. 17 Iga kan ijkulijto' kijliá Faraón: “Nimitztalij iga rey iga nimitznextilij nopoder iwán iga ipan inin tajli noyan mane-ixmatikan.” 18 Inón iga Dios kikneliá

† 9:7 9:7 Gn 21:12 ‡ 9:9 9:9 Gn 18:10 § 9:11-13 9:11 Gn 25:23; Mal 1:2,3 * 9:15 9:15 Ex 33:19

a'ya iga yéj kíkneļijneki, iwán kiyoltakuawiliá, a'ya iga yéj kiyoltakuawilijneki.

¹⁹ Iwán tej tine-ijlij: “Siga ijkón, ¿te iga Dios kijtowa iga itechko taga'? ¿A'yéj wel kijtowa iga amo mamochiwa ken Dios kineki?” ²⁰ ¡E' tej taga! ¿Te moteki in tej iga ximokueso iwán Dios? ¿Ix wel an se kómi' makijli yej kichij: “¿Te iga ijkín tinechij?”† ²¹ Pues yej kichiwa kómi' wel kichiwa ken yéj kineki, iwán ipan inonsan kónsoki' wel no kichiwa yej námol awel kikui, iwán se' yej a'san neši wel kikui.

²² ¿Iwán te tikijtoskej?, Dios kine' matanextili ken tacastigarowa iwán iga nochi makitakan ipoder, inón iga Dios ayá' kikuesowilij yej kajiá iga makicastigarokan yej onóyaja ga poli-wiskej. ²³ Ijkón kichij iga kinextij iweyipoder ipan tejemen yej te-iknelij, yej desde áchtosan tetapejpen iga matonokan kan yéj ono'. ²⁴ Dios tenotza', akita siga tijudiyojmej o ayéj. ²⁵ Ken ijkuilijto' ipan ama' yej kijkuiloj Oseas:

Yej ayéj katka nopilowan, nia nikijliti iga nopilowan.

Yej aniknekiá, niknekis.‡

²⁶ Iwán ompa kan mitzijlijkej: “Amejemen ayéj nopilowan”,

ompa yawij mitzijlij ipilowan Dios yej isato'.§

²⁷ E' iga israelitajmej, Isaías kijtoj ijkín: “Malej iga israelitajmej pox miakej ken tikita xajli yej ono' lamartenoj, petz alín kawiskej yej yawij

† 9:20 9:20 Is 29:16 ‡ 9:25 9:25 Os 2:23 § 9:26 9:26 Os 1:10

mosalvarotij. ²⁸ Ayá' wej katis toTeko yawi kijužgaroti nochi yej onokej ipan inin tajli."* ²⁹ Ken Isaias ikya kijtoj:

Siga toTeko yej nochi wel kichiwa, ayá' katka kikajteyawa alin toknimej iga tejemej matonokan, tipoliwikaja ken yej chantitoyaj altepe' Sodoma† iwán Gomorra.‡

Judiyojmej akentenderojkej

³⁰ ¿Te tikijoskej? Iga yej ayéj israelitajmej yej ayá' kitemowayaj iga maye'onokan iyixtaj Dios, yejemejwa' in yej máj ye'onokej iyixtaj Dios iga moconfiarowaj. ³¹ E' israelitajmej yej kitokayaj la ley, yej katka maye'onókanya iyixtaj Dios, awel kichijkej ken kijtowa inon ley. ³² ¿Te iga? Iga ayá' kitemojkej iga maye'onokan iyixtaj Dios iga san moconfiarowaj ipan Cristo, majwa' kinekiáj iga Dios makiye'ita yej kichiyayaj. Inon iga ken mokxiwitekikej ipan te'ti, iwán inonwa' te'ti kijtojneki Cristo.§ ³³ Ken kijtowa kan ijkuilijto': Nej niktaliá ipan altepe' Sion* se te'ti kan mokxiwitekilo, se te'ti yej tawetziltiá. Yej moconfiarowa ipan inon te'ti ayá' mopinajtij.†

10

¹ Nokniwan, noalmaj kineki iga israelitajmej mamosalvarokan, iwán kuá' niktenevia Dios,

* **9:28** 9:28 Is 10:22, 23 † **9:29** 9:29 Dios kitatij yej chantitoyaj altepemej Sodoma iwán Gomorra iga kichijkej yej ayekti. Gn 19.

‡ **9:29** 9:29 Is 1:9 § **9:32** 9:32 Is 18:14 * **9:33** 9:33 Sion se' itoka' Jerusalén. † **9:33** 9:33 Is 28:16

inón niktajtaniá. ² Niye'tajtowa iga yejemej, poxsan kiweyimatiltiáj Dios, e' ayá' kimatij ken iga makiye'chíwakan. ³ Iga ayá' kimatij ga Dióssan yej kichíwa iga se maye'ono iyixtaj yéj, majwa' yejémensan kitemowayaj imatikamej iga maye'onokan iyixtaj Dios, e' ayá' kichíwaj ken yéj kijtowa. ⁴ Iga wáaj Cristo, kitamiko iley Moisés, inán nochi yej moconfiarowaj pan Cristo ye'onoskej iyixtaj Dios.

⁵ Iga se maye'ono iyixtaj Dios iga kichíwa ken kijtowa la ley, Moisés ijkín kijkuiloj: “Yej kichíwa ken kijtowa la ley, iga inón mosalvaroj.”* ⁶ E' yej kisentaliá iyalmaj pan Dios iga maye'ono iyixtaj, ayí' tatajtani: “¿A'yéj tejkawis ipan cielo? —inín kijtojneki iga matiktemowikan Cristo, ⁷ niga ayí' tatajtani: ¿A'yéj temoj kan onokej iyalmajmej yej miktokej?” —inín kijtojneki iga matikojpa-ixitikan sej Cristo ken kuá' míkto'o'. ⁸ ¿Wan tetaj kijtojneki? “Itájtól Dios mona'san ono', iga ono' ipan moten iwán ipan moalmaj.” Ininwa' in itájtól yej ípan matimoconfiarokan, yej nejemej nikpowaj.† ⁹ Siga tikijtowa iga Jesús toTeko, iwán ipan moalmaj ticredowa iga Dios ki-ojpa-ixitij kan miktoya, mitsalvaroj. ¹⁰ Puej iga toalmaj ticredowaj, iwán ijkón iga tiye'onoj iyixtaj Dios, e' iga toten tiknojma-ijtowaj iga Jesús toTeko iwán ijkón iga Dios tesalvarowa.

¹¹ Kan ijkuilijto' itájtól Dios kijtowa: “Nochi yej kisentaliá iyalmaj pan yéj, ayá' mopinajtij.”‡
¹² Dios kiye'ita judiyojmej wan yej ayéj judiyoy-

* **10:5** 10:5 Lv 18:5 † **10:8** 10:8 Dt 30:12-14 ‡ **10:11** 10:11 Sal 34:22

jmej; puej tonochin tikpiáj sešan toTeko, iwán a'san nesi kipalewiá yej kitajtaniá. ¹³ Iga ijkín kijtowa itájtol Dios kan ijkulijto': "Nochi yej kitenewiá itoka' toTeko yawi mosalvaroti." § ¹⁴ E' ¿kén yawij kitenewitij toTeko Jesucristo siga ayá' nemi kicredowaj ipan yéj? ¿Iwán kén kicredoskej ipan yéj siga aya nemi kikakij de yéj? ¿Iwán kén yawij kikakitij siga ayagaj nemi kitatapowiáj de yéj? ¹⁵ ¿Kén yaskej kipowatij ye'noticiaj siga ayagaj kititanij? Ken kijtowa kan ijkulijto' itájtol Dios: "¡Pox monsj kuá' asij yej kipowaj ken iga matonokan tamelá, yej tematiltikoj ye'noticiaj!"*

¹⁶ E' ayá' nochi kicredojkej ye'noticiaj. Ken kijtowa profeta Isaías: "NoTeko, ¿ix agaj netajtolkuilijkej yej nikpojkej?"† ¹⁷ Ijkón yej moconfiarowaj ipan Cristo, achto kikakij itájtol. Iga makikakikan, kineki agaj makipowa inón ye'noticiaj.

¹⁸ E' nimitztajtani: ¿Ix an kikakikej in itájtol Dios? ¡Kena, kikakikej! Kan ikyay ijkulijto' kijtowa:

Itájtol yejemen mokagui' noyan ipan tajli, iwán itájtol ási'ya este ipan itajtamiyan inin tajli.‡

¹⁹ E' sej nitatajtani: In israelitajmej, ¿ix an aya kimatij? Moisés áchtoya kijtoj:

Nia nikchiwati iga xiyolkuesiwi iga se país yej ayéj niga país;

§ **10:13** 10:13 J1 2:32 * **10:15** 10:15 Is 52:7 † **10:16** 10:16 Is 53:1 ‡ **10:18** 10:18 Sal 19:4

nikch_iwas iga ximokuejkuesokan wan se país yej
pox yoltakuakti'.§

²⁰ Isaías sej mixewiá iga kijtowa:

Yej ayá' netemowayaj, neasikej;

iwán nikixnextilijkej yej ayá' netemowayaj.*

²¹ Iwán kuá' tajtowa de israelitajmej, Isaías kijtowa: “Semilwi' nimapatajtoya iga niknotztoyaj yej pox yoltakuaktikej iwán akinekij manetokakan.”†

11

Dios ayá' kisenkokajtej israelitajmej

¹ Inán nitatajtani: ¿Ix an Dios kitepo'má' israelitajmej? ¿Ayéj ijkón! Nej no ni-israelitaj yej ipilówampa Abraham ipilowan, iwán itríbuja Benjamín. ² Dios ayá' nemi kitepo'maka yej yéj kitapejpen, inón yej pox ikyay kixmati. ¿Ix ayá' ankimatij kan ijkulijto' ipan itájtól Dios yej kichij Elías, kén iga yéj kuá' kitenewij Dios kitelwij israelitajmej? Kijtoj: ³ “NoTeko, kimijmiktíjkeja moprofetajmej, inewi moaltar kixixitinkej, iwán nejsan nikawi' noselti, e' nej no nemiktijnékija.”* ⁴ E' Dios kijlij: “Nikpiao' siete mil tajtaga' yej netokaj, yej ayá' motankuaketzej iyixtaj ídolo yej kijliáj dios Baal.”† ⁵ Puej ijkonsan no inán, acho' kawikej sekin israelitajmej yej Dios kiknelij iwán kitapejpen. ⁶ Iwán siga san kitapejpen iga yéj ijkón kiknelij, ayejwa' iga se kichij yej yékti;

§ **10:19** 10:19 Dt 32:21 * **10:20** 10:20 Is 65:1 † **10:21** 10:21
Is 65:2 * **11:3** 11:3 1 R 19:14 † **11:4** 11:4 1 R 19:18

porque siga se makichiwapa yey yekti, ayejwa' iga ta-ikneliá Dios.

⁷ Inán, ¿kén tikijoskej? Israelitajmej ayá' kasikej yey kitemowayaj, e' yey Dios kitapejpen, kena kasikej. Sekin moyoltakuawilijkej. ⁸ Ken kijtowa kan ijkulijto' itájtol Dios: “Dios kikuatapololtij inomej; kimá' iyixmej, e' kixtzakua' iga amo matachakan iwán kimá' inakamej, e' ayá' takakij, iwán este inán ijkón onokej.”[‡] ⁹ David no kijtowa:

Kua' nemi ilwichiwaj, mamawetzikan ken toto' yey kawí ipan kuakakax

iga makikitzkikan iga makicastigarokan. §

¹⁰ Iyixmej, mapajpachatiakan, iga amo matachakan, matepotzwijkoliwikán iwán ijkón makawikan.*

Kén iga mosalvarowaj yey ayéj judiyojmej

¹¹ Nimitztajtani inán: ¿Ix an mela'wetzikej in israelitajmej wan ayí' moketzaskej? ¡Ayá'!, e' kua' israelitajmej ayá' kichijkej ken kijtowa Dios, iga inón mosalvarojkej yey ayéj israelitajmej, iga inán mamixkuítikan israelitajmej iga maki-credokan no. ¹² Iwán siga pan yey ayompa kichijkej judiyojmej, moye'chijkej nochi tokniwan yey onokej ipan inín tajli, iwán siga kan wetzikej judiyojmej, moye'chijkej yey ayéj judiyojmej, imajya sej moye'chíwaskej siga judiyojmej inochimej sej makitokakan Dios!

¹³ E' nimitzijlijneki tejte amejemen yey ayéj anjudiyojmej. Nej iyapóstol Dios iwán yéj netitan

‡ 11:8 11:8 Is 29:10 § 11:9 11:9 Sal 69:22 * 11:10 11:10 Sal 69:23

iga itájtɔl manikpowili yej ayéj judiyojmej, pox nikyé'ita iwán nikyɔlmaka iga nikchiwa yej netekimakakej. ¹⁴ Nikneki iga tokniwan yej de nejémenpasan judiyojmej makichivasnekikan yej amejemen ankichiwaj iga ankixmatij Cristo, iwán ijkón wel mamosalvarokan. ¹⁵ Puej siga kuá' judiyojmej moyokatijtoyaj wan Dios, ompa pewa' iga yej ayéj judiyojmej wel moyoltaliáj wan Dios, ¿ix aya'taj majya sej kuá' yejemej mamokuepakan? Iga ijkón kichivaskej, ken ojpa-isaskej sej kan mikttoyaj.

¹⁶ Puej siga agaj kimaka iga ofrenda Dios yej áchtopa pan yej mochíwa iga itixyo trigo, inón kijtojneki iga nochi tixti nɔ Dios kiyé'ita. Iwán siga agaj kimaka iga ofrenda Dios inelwayo se kuawi', nɔ nochi imajma' inón kuawi' Dios kiyé'ita.

¹⁷ Sekin judiyojmej yej ken imela'majma' olivojkuawi',† kimajmatzontekkej iga Dios ay' kiyé'ita'. Iwán tej ken se imajma' olivojkuawi' yej momati ipan kuayoj yej ípan mitzin-jertarokkej. Ijkón iga tej tixwato' ipansan inón inelwayo iwán wel tono' iga san inón iyayo.

¹⁸ E' amo ximomachili iga tej majya sej que imela'majma' olivo, yej kitojneki judiyojmej. Siga timomachiliá iga tej majya sej, xikejlamiki iga ayéj mopan ixwato' inelwayo, sino tej tixwato' pan inelwayo mela'olivoj.

¹⁹ Anka tikijtoj: “Kena, e' imajma' kit-zojtzontekkej iga nej mane-injertarokan ipan olivojkuawi'.” ²⁰ Ijkón; e' kitzojtzontekkej iga

† 11:17 11:17 Xikita glosario “Olivo”.

ayá' moconfiarojkej ipan Dios, iwán tej ompa tonó' iga san timoconfiaroj ipan Dios. Inón iga amo ximoweyimati, sino que achi xikmajmawili Dios. ²¹ Siga Dios ayá' kíkñelij imela'majma' olivo, welsan nō tej ijkón mitzchīwilij. ²² Ta' xikita kén iga Dios pox ta-ikñeliá, e' nō kikuesowa yej ayá' kichīwa ken yej kijtowa. Ijkón kichij wān inomej yej wetzikej, e' tej pox mitzikñelij. Dios mitzikñeliao' miej timoconfiarowa ipan yej; e' siga ayá', tej nō yawij mitzontekitij. ²³ E' siga judiyojmej sej kicredowaj, yejemej sej ki-injertaroskej pan olivojkuawi'; iga Dios kipiá poder iga sej makichīwa. ²⁴ Siga tej yej ayéj tijudiyoj, mitzontekkej ipan kuayojolivoj, iwán mitzinjertarojkej ipan ye'olivojkuawi', malej iga tej ayéj de inómbapa kuawi', imajya sej judiyojmej, yej imela'majma' olivojkuawi', yawij ki-injertarotij kan achto onoyaj!

Kén iga yawij mosalvarotij judiyojmej

²⁵ Puej nokniwān, nikneki xikmatikan yej aya momatiá, yej Dios kichīwasneki, iga amo ximomachilikān iga poxsan antamatij: israelitajmej ayá' momela'yoltakuawilijkej inochimej, e' ijkón onoskej este que mamasi yej ayéj judiyojmej, yej yawij kicredotij ipan Cristo. ²⁶ Kua' inón mochīwas, íkua' nochī israelitajmej mosalvaroskej, puej kan ijkuilijto' kijtowa:
Yej tasalvarowa yawi witzeti de Sion,‡

‡ **11:26** 11:26 Sion se' itqka' Jerusalén.

iwán yej ayękti kichijkej israelitajmej, yawij
kiperdonarıqtij. §

27 Iwán inın nikchıwas wın yejemen,

kuá' nikperdonarıwılıj yej kichijkej yej ayękti.

28 Iga judiyojmej akicredoijkej ye'noticiaj, kiji-
yakej Dios, ijkón inán mitzojtapowilijkej ame-
jemen yej ayéj anjudiyojmej iga wel xicredokan
ye'noticiaj. E' Dios kinéki-o' in judiyojmej iga
Dios kitapejpen iyikyapatajmej. 29 Puej yej Dios
temaka, ayo' sej tekuiliá, niga yej kinotza', ayá'
ompay kisenkokajtewa. 30 Amejemen ikya ayá'
ankichijkej ken kineki Dios, e' iga judiyojmej ayá'
kichijkej ken Dios kineki, inón iga inán ame-
jemen Dios mitzikneliáj. 31 Ijkonsan no yejemen
inán ayá' kichıwaj ken Dios kineki, e' iga san Dios
makınextili iga wel kikneliáj yejemen, kensan no
amejemen mitziknelijkej. 32 Dios kikajtej nochi
iga makichıwakan yej ayękti, iga inán Dios nochi
wel makikneli.

33 ¡Poxsan weyi itamatilis Dios iwán Yéj pox
kojasi yej kichıwa! Ayá' wel tikojasij ken
yéj kejlámiki, niga wel tikentenderowaj yej yéj
kichıwa. 34 Puej, ¿a'yéj kimati yej toTeko ke-
jlámiki? ¿O a'yéj kimachtij? 35 ¿Ix ono' an
agaj yej achto kimá' tejté toTeko iga yéj inán
kenkuá' kixtawa yej kimakakej? 36 Nochi itatki
Dios, iga yéj nochi kichij iga yéjsan. ¡Nochipa
mamoweyimatilti Dios! Ijkónyawa'.

§ 11:26 11:26 Is 59:20,21 * 11:34 11:34 Is 40:13,14

12

Xiksentalıkan amoqlmaj ipan Dios

¹ Nokniwan, Dios te-ikneliá, inón iga nimitztajtaniliáj iga amejemen nochipa xiye'nemikan ipan iyojwi. Iga ijkón ankichiwan, ken tikita ankimakaj Dios se ofrenda yej isato'. Inón Dios kiye'ita, ijkón nokta kajasi iga matikye'weyimatiltikan.

² Ayo' xikchiwakan ken kichijtokej toknimej yej ayá' kixmatij Dios, majwa' ximomakakan iga Dios mamitzyolpatakan iga se'ya ken antajlamikij, ijkón ankimatiskej yej Dios kineki iga xikchiwakan, yej pox yekti, yej kiye'ita Dios.

³ Nikmati iga Dios poxsan ne-iknelij iga netalij iga iyapóstol, inón iga nimitzijliáj iga sejsé de amejemen, amo agaj mamomachili iga majya sej que se'. Majwa' sejsé de amejemen ximomachilikan kén amonokej, ke'san Dios mitzchiwaltíáj iga ximoconfiarokan ipan yéj. ⁴ Ijkón ken tejemej ayá' tikpiáj petz tokxi wan toma', sino que tikpiajo' máj sekin miembros iwán nochi inomej ayá' sesan itekipanolmej kipiáj, ⁵ ijkonsan no tejemen, malej iga timi-akejmej, e' pan Cristo sesan timochiwaj, iwán tonochin tisetitokej ipansan se.

⁶ Dios temá' sese'pa yej wel tikchiwaj, kensan yéj kiye'ita temá'. Siga Dios tetajtolmaka iga matikijtokan itájtól, matikchiwakan san ke' iga timoconfiarowaj pan yéj. ⁷ Siga Dios temá' iga wel matikchiwakan tejté iga agaj, matikye'chiwakan. Siga Dios temá' iga wel titamachtiáj, inón nokta matikchijtokan.

⁸ Siga Dios temá' iga wel titayolchikawaj, inón matikchijtokan. Siga Dios temá' iga wel matitamakokawikan tejté, matikyolmakakan iga tikchijwaj. Yej ono' iga ken tzontekon pan tejté kan Dios kitálij, makiye'chiwa itekipánol; yej kipaléwiá yej amotapialiáj, mapaki iga kichijwa.

Kén makichijwa yej kitoka Cristo

⁹ Ximomela'sepanchokilikan wan amoknimej. Xikijiyakan yej ayékti iwán xikchijwakan yej yékti. ¹⁰ Ximosepanchokilikan wan amoknín ken sesan amotaj; xikita moknín majya sej que tej.

¹¹ Amo ximosemakakan, xikyolmakakan yej ankichijwaj, te xiyolpaktokan iga xikchijwakan yej Dios kineki.

¹² Mie j ankichixtokej toTeko, xipaktokan. Kua' tejté mitzyolmiktiáj, xikijyowikan iwán amo xikajtewakan iga ankitenewiáj toTeko.

¹³ Xikpaléwikan tokniwan yej kitokaj Dios yej amotapialiáj. Xikomemawikan wejkachanej yej akipiáj kan kochij.

¹⁴ Xiktajtanilikan Dios iga maye'onokan yej mitziknochiwaj iwán ayá' xikmalijlikan.

¹⁵ Xipakikan wan yej paktokaj, iwán xisenchokakan wan yej nemi chokaj.

¹⁶ Xonokan ken sesan amoalmaj wan amokniwan. Amo ximoweyimatikan, ximomachilikan kensan inomej yej ayá' motapialiáj. Amo pansan amejemen ximomachilikan iga poxsan antamatij.

¹⁷ Siga agaj mitzchijwiliáj yej ayékti, amo no ijkón xikchijwilikan. Nochipa xiktemokan yej yékti iga xikchijwilikan nochi tokniwan.

18 Xikchiwakan este kan maj anwelitij iga xonokan tamelá iwán nochi. 19 Nokniwan yej nimitzpoxchokiliáj, amo ximomatikan kua' agaj mitzchiwiliáj yej ayekti, xikajtewilikan iga Dios makicastigaro yej mitzchiwilijkej yej ayekti; iga ijkín kijtowa kan ijkulijto': "Nejwa' in yej nitacastigarowa; nej nia nimomatiti wan inón yej kichij yej ayekti, kijtowa toTeko."* 20 Iwán nõ kijtowa: "Siga yej mitzijiya mayana, xiktamaka, siga ataneki, xikamaka; iga inón tikchiwas, este xajxaygatatawiás iga pinawas."† 21 Amo ximoyolyamana iga xikchiwa yej ayekti, majwa' xiktanili yej ayekti iga xikchiwa yej yekti.

13

1 Nochi toknin makichiwa ken tatekimaka tekiwajmej. Iga ateyi nisé tekiwaj yej ayá' kitajlij Dios, iwán yej inán mandarowa, Dios kitajlij. 2 Inón iga yej ayá' kichiwa ken tatekimaka tekiwajmej, ayá' nemi kichiwa ken Dios tatekimaka. Yej akichiwa ken tatekimaka tekiwajmej, inón yawij kicastigarotij. 3 Tekiwajmej ayá' onokej iga makimajmajtikan yej kichiwaj yej yekti, yejemen onokej iga yej kichiwaj yej ayekti. Siga ayá' tikneki xikmajmawilijto tekiwajmej, xitawelono, iwán tekiwajmej mitzye'itaskej. 4 Tekiwajmej nemi kichiwaj ken Dios kineki iga xitawelono. E' siga ayá' tiye'nemi, ijkón sí ximajmawi; tekiwaj ayá' báldejsan mandarowa, wel nõ tacastigarowa. Tekiwaj kichijto' ken Dios kineki iga kicastigarowa yej kichiwa yej ayekti. 5 Inón

* 12:19 12:19 Dt 32:35 † 12:20 12:20 Pr 25:21, 22

iga matiktajtōlkuikaṅ tekiwajmej, ayejsan iga amo matecastigaro, sino que tikmatitokej ipan toalmaj iga matiye'nemikaṅ nokta. ⁶ Inōn iga amejemen ankixtawaj yej kijliáj impuestos,* iga Dios ompa kitālij tekiwajmej iga makichiwakaṅ itekipanōlmej ken kajasi.

⁷ Nochi yej mo-ixtawa, xixixtawakaṅ, san katiapa impuesto yej ono', xik-respetarōkaṅ nochi yej kajasi.

Matimosepanchōkilikaṅ

⁸ Amo agaj xikdeberōkaṅ ni alín, majwa' ximosepanchōkilikaṅ; iga yej kichōkiliá iyiknīn, kichija ken tatekimaka la ley. ⁹ Ijkīn tatekimaka Dios: “Siga tināmiktito', amo xaj wān se'; amo xitamikti, amo xitachteki, amo xitanāmōlpanti, amo xikpiasneki yej se' itatki”; e' siga “tikchōkiliá moknīn kensan tej timochōkiliá”, nemi tikchiwa nochi ken tatekimaka la ley. ¹⁰ Yej kichōkiliá iyiknīn awel kichiwiliá yej ayēkti; inōn iga, siga tiknekij toknīn, pan inōn tikchiwaj ken kijtowa nochi la ley.

¹¹ Xikchiwakaṅ nochi inīn iga ankimatij na'ya wī' toTēko. Akajasi iga matikochtokaṅ, majwa' matisatokaṅ iga majya na' ono' iga tēmanawiki Dios que kuā' iga achto ticređojkej itājtol. ¹² Ken tikita pox tayōwaya, iwān ayo' wej káj iga tanēsis; inōn iga matikajtewakaṅ iga tikchiwaj yej ayēkti, yej kichīwa yej ayēkti ken kuā' ono' kaṅ takomichkaṅ. Matikchiwákanya yej yēkti ken kichīwa yej nemi kaṅ tawilpan iwān nochi

* **13:6** 13:6 Xikita glosario “Impuestos”.

kita. ¹³ Matiye'nemíkanya ken se nejnemi kua' tanesto'. Amo matitawanakan niga matiakan ilwitaj kan tawanalo, niga mati-ajapanemikan iwán amo matikchiwakan nité yej ajayekti, amo matitakuejkuesokan, niga matita-ixitakan. ¹⁴ Iga ijkón ankichiwaj, toTeko Jesucristo mitzpalewiáj iga anye'nemij, iwán amo xikejlamikikan iga ankichiwaj yej ayekti ken mitzyoltilanaj amoalmaj.

14

Amo xikpopowa moknïn

¹ Siga se aya momela'confiarowa ipan* Cristo, xikomemawikan iwán amo ximotenkitzkikan iwán igasan ayá' kichiwa yej amejemen ankiye'itaj. ² Sekin kijtowaj iga wel kikuaj nochi tákual, e' sekin yej aya momela'confiarowaj ipan Dios, kikuaj petz verdura. ³ Yej kikua nochi, amo makipinajti yej akikua nochi, iwán yej akikua nochi, amo makijto iga ayompa kichijto' yej kikua nochi, iga Dios ijkón kiye'ita inón toknïn. ⁴ In tej, ¿te moteki iga tikijtowa iga ayompa kichijto' yej se' itekipanowani? Siga kichij yej yekti o ayekti, inonwa' kimati iteko. Iwán toTeko Dios kena kiye'itas inón toknïn, iga Diossan yej wel kichiwa iga matiye'onokan iyixtaj.

* **14:1** 14:1 Español: “débil en la fe”, kijtojneki iga anka némi-o' pewa iga moconfiarowaj ipan Jesucristo yej achto katka judiyojmej iwán awel kikuayaj nochi tákual iga ijkón kijtowa iley Moisés.

⁵ Ono' sekin yej máj kiye'itaj se día[†] que se' día, iwán sekin kimatij iga nochi día kensan nochi día. Sejsé makimela'matito iga ijkonya ken kejlanto'. ⁶ Yej máj kiye'ita se día que se', inonwa' iga kiweyimatiltiá toTeko; iwán yej ayá' máj kiye'ita nisé día, nō kiweyimatiltiá toTeko. Wān yej nochi kikua yej mókuapa, kuá' kikua, kiweyimatiltiá toTeko iga kimaka gracias Dios; wān yej kíkuasan petz verdura, akikua naka' iga kiweyimatiltiá toTeko iwán kimaka gracias Dios.

⁷ Ayagaj de tejemej ono' iga yéjsan mamoweyimati, niga agaj mateweyimatilti kuá' timikíkeja. ⁸ Puej siga tisatokej, matonokān iga matikweyimatiltikān toTeko, iwán siga timikij, mamoweyimatilti toTeko. Inón iga siga tisatokej o timiktoskej, tejemej itatki toTeko. ⁹ Inón iga Cristo migui' iwán sej ojpa-isa', iga mochij iTeko yej miktoskej iwán yej isatokej.

¹⁰ In tej, ¿te iga tikijtowa iga ayompa kichijto' mokin? ¿O te iga tikpinajtiá? Tonochin tiawij tonotij iyixtaj Cristo kuá' yéj yawi tejuzgaroti.

¹¹ Kan ijkulijto' itájtōl Dios kijtowa ijkín:

Niknojma-ijtowa nokta iga inin mochīwas,
kijtowa toTeko, iga no-ixtaj yawij
motankuaketzatij nochi,
iwán nochi kitenewij notōkā' iga yawij kiweyimatiltitij.‡

¹² Inón iga sejsé de tejemej tiawij tikijtoj iyixtaj Dios yej tikchijkej.

[†] **14:5** 14:5 Judiyojmej motekisewiayaj el sábado wān kipiayaj sekin máj día iga kilwichiwiliayaj Dios, e' ayá' nochi yej kitokayaj Jesús ijkón kichīwayaj. [‡] **14:11** 14:11 Is 45:23

Amo xikwetzilti mokn̄in ipan iyojwi Dios

¹³ In̄on iga ayo' matikijtoḱan iga tokn̄in ayompa kichijto'. Majwa' xiksentaliḱan amoalmajmej iga amo xikchiwak̄an nité yej makixipolo mokn̄in niga makikixti ipan iyojwi toṬeko. ¹⁴ Nej nikmati iga toṬeko Jesús nenextilij iga ateyi tákual yej ayá' nokta mokua; e' siga agaj keḷlamiki iga iley Moisés te-ijliao' iga se tákual ayekti iga mokua, amo makikua. ¹⁵ Iwán siga yej tej tikua, iga in̄on tikyolmiktia mokn̄in, ayekti tikchiwa iga ompa neṣi ayo' tikneki mokn̄in. Cristo migui' iga in̄on mokn̄in, iwán amo xikchiwa iga san yej tikua, mapoliwi mokn̄in. ¹⁶ Amo xikchiwak̄an iga mamaltajtoḷo iga in̄on yej amejemen ankiye'itaj iga ankichiwaj. ¹⁷ Iga inán Dios reinarowaṢ pan tejemen, ayéj máj importante tákual niga yej mooniá, majwa' matiye'nemikan, matonokan tamelá iwán matipaktokan. In̄on kichiwa iyEspíritoj Dios pan tejemen. ¹⁸ Yej ijkón kichiwa iga kitoka Cristo, Dios kiyé'ita iwán toknimej no.

¹⁹ In̄on iga matiktemokan yej kichiwa iga matonokan tamelá, iga ijkón wel timosepampalewiáj iga máj matimoconfiarokan ipan Cristo. ²⁰ Amo matikawaltikan yej Dios nemi kichiwa ipan se' tokn̄in, iga san yej tikuj. Nochi tákual yekti, e' siga tikua tákual wan se' mitzita yej kimati iga ayekti mamokua, iga in̄on tikchiwa, tokn̄in tikchiwaltia yej ayekti. ²¹ Yekti iga amo mamokua naka', niga mamooni vino, nité amo xikchiwa yej mokn̄in makichiwalti yej ayekti.

§ 14:17 14:17 Xikita glosario "Kén iga Dios reinarowa".

Amo matikch_iwak_an nit_e yej makikxipolo tokn_in ipan iyojwi toT_eko. ²² Ken iga timoconfiarojto', tej ijk_on xikchijto iyixtaj Dios. ¡Mapakto in_on taga' yej kimatito' iga yej nemi kich_iwa ijk_onya nokta! ²³ E' siga agaj kikua tejt_e iw_an ay_a' kimela'mati iga y_ekti mamokua, y_ej itechko siga kich_iwa yej ay_ekti iga kikua, iga ay_a' sesan iyalmaj iga kikua. Iw_an nochi yej s_e kich_iwa ku_a' kimatito' iga amo makich_iwa, in_on ay_ekti nokta.

15

Xikch_iwak_an ken kiye'ita amokn_in

¹ Tejemej yej timoconfiar_owaja ipan toT_eko, matikpalew_ik_an tokn_iw_an yej aya momela'confiarowaj ipan toT_eko. Amo matikch_iwak_an yejsan tejemej tiknekij. ² Sejs_e de tejemej matikch_iwil_ik_an yej tokn_in kiye'ita iga maye'ono, iw_an matikpalew_ik_an iga mamoconfiaro maj pan Dios. ³ Niga Cristo ay_a' kichij yej y_ej kine'; majwa' mochij ken k_an ijk_uilijto' Dios it_ajt_ol: "Yej mitzmalijlijkej, in_an nej n_o nem_alijlijkej."* ⁴ Puej nochi yej ikyay ijk_uilijto' it_ajt_ol Dios, mo-ijk_uiloj iga matimomacht_ik_an iw_an tepalewi_a iga amo matimosemakak_an. In_on t_ajt_ol tey_olchik_awa w_an tenextili_a iga k_eman Dios temakas yej kijtoj. ⁵ Dioswa' in yej tepalewi_a iga amo matimosemakak_an iw_an tey_olchik_awa, y_ejwa' in yej niktajtanili_a iga mamitzpalew_ik_an iga xikpiak_an sesan amoalmaj, ijk_on ken kineki Cristo Jes_us, ⁶ iga amonoch_in xisentaku_ik_an

* 15:3 15:3 Sal. 69:9

iga xikweyimatiltikan Dios yej iTaj toTeko Jesucristo.

Mopowiliá ye'noticiaj yej ayéj judiyojmej

⁷ Inón iga ximosepan-omemawikan, ijkón ken-san Cristo nq teomemawij, iga ijkón Dios makiweyimatiltikan. ⁸ Puej nimitzijliáj iga Cristo wálaj iga makipalewi judiyojmej iga mamochiwa ken Dios ikya kijlij iyikyapatajwan, iga ijkón Dios kinextij iga kichiwa yej kijtoj. ⁹ Cristo wálaj nq iga yej ayéj judiyojmej makiweyimatiltikan Dios iga kikneliáj, ken kijtowa kan ijkuilijto' itájtol Dios:

Inón iga nia nikpowati motájtol ipan paismej, iwán nimitztakuikilij iga nimitzweyimatiltij.†

¹⁰ Ono' se' kan ijkuilijto', kijtowa:

Xisempakikan amejemen yej ayéj anjudiyojmej, xipakikan iwán inomej yej itatki Dios.‡

¹¹ Ono' se' kan ijkuilijto', kijtowa:

Nochi paismej, xiktakuikilikan toTeko, iwán nochi xikweyimatiltikan Dios.§

¹² Isaías nq kijkuiloj:

Kisas ipan ipilowan ipilowampa Isaí,*

se yej yawi kigobernaroti yej ayéj judiyojmej; yej ayéj judiyojmej moconfiaroskej ipansan yéj.†

¹³ Niktajtaniliá Dios yej tepalewiá iga wel timoconfiarowaj ipan yéj iga nochi ye'kisas, mamitzylchikawakan iwán makichiwa iga xonokan tamelá iga pan yéj ankisentálijkej

† **15:9** 15:9 Sal 18:49 ‡ **15:10** 15:10 Dt 32:43 § **15:11** 15:11 Sal 117:1 * **15:12** 15:12 Cristo de la familia de David yej ipiltzjn Jesé yej nq itoká' Isaí. Mt 1:6, 1 Sam 16:10-13 † **15:12** 15:12 Is 11:1,10

amoalmaj. Inón iga wel máj anmoconfiarowaj ipan yéj iga nochi ye'kisas iga mitzpaléwiáj iyEspíritoj Dios.

¹⁴ Nokniwan nej nikmati iga amejemen poxsan ante-ijiknimej iwán ankimátija itájtol Dios iwán welya anmosepannonotzaj. ¹⁵ E' ipan inín ama' nimixewij sej iga nimitzijkuilowilijkej inimej tajtolmej iga amo xikelkawakan. Inín nikchíwa iga Dios ne-iknelij iwán nemá' inín tekipánol ¹⁶ iga nej itekipanowani Jesucristo. Nikuiguiliá itájtol Dios yej ayéj judiyojmej iga inón notekipánol. Ijkón yej ayéj judiyojmej Dios makikui iga ofrenda yej makiye'ita. El Espíritu Santo mitztapejpenkej iga xonokan ken ofrenda iga Dios.

¹⁷ Iga nej Cristo Jesús netapejpen iwán niyolpaki iga nikchíwa itekipánol Dios. ¹⁸ Yej nikijtowa, petz yej Cristo kichij iga nepalewij iga manikchíwa, iwán manikpowa itájtol iga ijkón yej ayéj judiyojmej makichíwakan ken kineki Dios. Yej ayéj judiyojmej kicredojkej yej nikijtoj wan yej nikchij. ¹⁹ Yejemen kicredojkej iga kitakej milagro wan yej ayi'pa mo-ita yej mochij iga ipoder iyEspíritoj Dios. Noyan nikpówa'ya itájtol Cristo yej tamanawia, nipewa' Jerusalén iwán niajka este ipan ital Ilirico. ²⁰ Ijkón nochipa nikne' manikpowa itájtol Dios yej tamanawia kan aya i' kikakij itoka' Cristo, iga amo manitekipano kan se'ya kipewaltij tekipánol. ²¹ Majwa', mochij ken kijtowa kan ijkuilijto' Dios itájtol:

Yawij kitatij inomej yej ayi' kimatikej de yéj,

iwán kentenderoskej yej ayí' kikakikej de yéj.‡

Pablo yajneki Roma

²² Inón iga nokta ayá' nemi nia nimitz-paxalowilitij, malej iga mia' vej niajnekiá. ²³ E' inán iga niktámija notekipánol nigaj kan ninemi, ay' te netzakuiliá, iwán íkyaya nikneko' iga manono amowan. ²⁴ Kua' niaj España, niaj nimitz-paxalowilitij. Nikneki iga ompa manipano iga matisenyolpakikan, malej iga nimaninsan, iwán kua' ni-ójkuisya, nikjtowa iga achi xinepalewikan. ²⁵ Inán nia Jerusalén, nikuiga tomín iga tokniwan yej amotapialiáj yej ompa onokej. ²⁶ Iga yej chantitokej estado de Macedonia iwán Acaya kejlankej iga kinechkojkej achi tomín iga kititaniliáj tokniwan yej amotapialiáj yej onokej Jerusalén. ²⁷ Kiyē'itakej iga kichiwaj inín, iwán yejemej nokta kimatantokej in judiyojmej; iga judiyojmej yej kicredowaj Jesús kimakokatijkej no itájtol Dios yej ayéj judiyojmej, inán yejemej no makipalewikan iga tomín judiyojmej. ²⁸ Inón iga, kua' tamis nikchiwas inín, iwán nikmakáskeja tomín, niajya España, e' ompa nipanoj iga nimitz-paxalowiliskej. ²⁹ Nikmati iga kua' niaj ompiga Roma, ayo' tepoloskej nité iga Cristo tesenyolchikawas.

³⁰ Nokniwan, iga timoconfiarowaj ipan toTeko Jesucristo, iwán iga iyEspíritoj Dios kichiwa iga matimochokilikan, nimitztajtaniá iga achi xinepalewikan iga xiktajtaniá Dios iga nej. ³¹ Xiktajtaniá Dios iga manemanawi ipan inomej yej akicredowaj Dios yej onokej

‡ 15:21 15:21 Is 52:15

Judea. Xiktajtaniḷikan nō iga inin tom̄in yej nikuḡuiliá tokniwan yej onokej Jerusalén wel manewelkuḷikan. ³² Iwán siga Dios ijkón kineki, nia nipakti-asiti wan amejemen iga nimitzitaskej, iwán ompay timoyolchikawaskej. ³³ Dios yej kich̄iwa iga matonokan tamelá, maono wan amejemen. Ijkónyawa'.

16

Pablo tanonotza

¹ Nimitzmat̄iltiáj iga xikye'itakan la hermana Febe. Yéj kitálkej* iga makipalewi yej kicredowaj Dios yej chantitokej altepe' Cencrea. ² Xikye'omemawikan ken kajasi iga mamochiwili yej tiksentakaj toDios, iwán xikpalewikan siga tejté kipolowa, iga yéj mia'ya kipalewij, iwán nej nō nepalewij.

³ Xikijlikan la hermana Priscila wan el hermano Aquila† iga nikejlamikij; iwamej nisen-tekipojkej iga nikpojkej itájtōl Cristo Jesús. ⁴ Yejemej ayá' majmawikej iga mamikikan kuá' nemanawijkej. Inón iga nikmakaj gracias, ayejsan nej, nochi tokniwan kajkan monechkōlo yej ayéj judiyojmej, yej kitokaj Dios. ⁵ Ijkonsan nō xikijlikan tokniwan yej monechkowaj chan Priscila iwán Aquila iga nikejlamikij. Nō xikijlikan noamigoj Epeneto iga nikejlamiki, yéj achto yej kicredoj Cristo ipan estado de Acaya. ⁶ Xikijlikan nō María iga nikejlamiki iga yéj poxsan tekipoj iga amejemen. ⁷ Xikijlikan

* **16:1** 16:1 Español: diaconisa, xikita glosario "Diácono wan diaconisa". † **16:3** 16:3 Hch 18:2

nə nıkejlamiki Andrónico iwán Junias, yejemen nə judıyojmej kensan nej, iwamej nonoyaj çarcelıjtı'. Poxsan kiye'itakej apostolejmej, iwán yejemej máj achto kicredojkej Cristo que nej.

⁸ Xikijlikan nə nıkejlamiki Amplias, yéj noamıgoj yej nə kitoka toTeko. ⁹ Xikijlikan nə nıkejlamiki Urbano, yej iwán nisentekıpanojkej ıga nikpojkej itájtól Cristo Jesús, iwán Estaquis yej nikpoxçokiliá. ¹⁰ Xikijlikan nə nıkejlamiki Apeles, yej monéxtija ıga kisentalıjto'ya iyalmaj pan Cristo. Iwán xikijlikan nə nıkejlamiki tokniwan yej onokej íçan Aristóbulo. ¹¹ Xikijlikan nə nıkejlamiki Herodión yej nə judío kensan nej, iwán yej onokej íçan Narciso, yej kitokaj toTeko. ¹² Xikijlikan nə nıkejlamiki Trifena iwán Trifosa, yej tekıpanowaj ıga kipowaj itájtól toTeko, iwán la hermana Pérsida, yej poxsan tekıpanoj ipan iyojwi toTeko. ¹³ Xikijlikan nə nıkejlamiki Rufo yej toTeko kitapejpen iwán xikijlikan nə nıkejlamiki iye', iye' Rufo ken tikita noye' nə. ¹⁴ Xikijlikan nə nıkejlamiki Asíncrito, Flegonte, Hermas, Patrobas, Hermes iwán tokniwan yej onokej iwamej. ¹⁵ Xikijlikan nə nıkejlamiki Filólogo iwán Julia, Nereo wan isiwa-ıknın, iwán Olimpas iwán nochi tokniwan yej kitokaj toTeko yej onokej iwamej.

¹⁶ Xımopıpitçokan ıga xımosaludarokan ken Dios kiye'ıta. Nochi tokniwan yej kitokaj Cristo, nə mitzejamikij.

¹⁷ Nokniwan, nımitztajtaniliáj ıga amo xikwelkuilıkan itájtólmej yej tayojoykatiáj iwán

tapojpolowaj, iga tamachtiáj ayéj ijkón ken mitzmachtijkej. Amo ximotokakan iwamej, ¹⁸ iga inomej ayá' kichiwaj ken kineki toTeko Jesucristo, majwa' kichiwaj ken kinekij yejemej, iwán kiyolyamanaj tokniwan yej aya kojasiy iyojwi Dios, iga tajtolmej yej te tzojtzopéli'san este teye'asi, e' takajkayawaj. ¹⁹ Nochi kimati iga ankichijkej ken mitztekimakakej. Inón iga nipaki iwán nikneki iga xikye'tapejpenakan iga ankichiwaj yej yekti, e' xikajtewakan yej ayekti. ²⁰ Iwán Dios yej kichywa iga matonokan tamelá ay' ke' poliwi, yawi kitaniłiti Tzitzimi' iwán kitalıj amokxitan. ToTeko Jesucristo mamitzyolchikawakan.

²¹ Mitzejlamikij nō Timoteo yej íwan nisen-tekipanowa, iwán nō Lucio, Jasón wan Sosípater, yej judiyojmej nō kensan nej.

²² Nej notoka' Tercio, yej nemi nikijkuilowa itajtolmej Pablo pan inín ama', nō nimitzejlamikij ipan itoka' toTeko.

²³ Mitzejlamikij nō Gayo. Nej Pablo nono' íchan Gayo, iwán nij íchan motekinechkowaj nochi tokniwan yej nij kitokaj Cristo. Nō mitzejlamikij Erasto yej kena tomın iga tekiwajmej de inín altepe', iwán mitzejlamikij nō toknın Cuarto.

²⁴ ToTeko Jesucristo mamitzyolchikawakan amonochın. Ijkónyawa'.

Pablo kiweyimati toDios

²⁵ Inán matikweyimatiłtikan Dios yej kichywa iga máj ximoconfiarokan ipan yéj. Dios mitzpalewiáj iga anckredojkej kuá' nimitzpowilijkej itajtōl Jesucristo yej tamawanawía. Inın ijkonsan

ken Dios kinextij yej kichiw_iwasnekiá yej aya momatiá, inón iyantoya este pox ikyay este iga aya ono' inín tajli, ²⁶ e' inán momátiya. Dios yej nochipa ono', tatekimá' iga profetajmej makijkuilokan itájtol Dios iga mamomátiya ipan nochi paismej iga makicredokan iwán makichiwakan ken yéj kineki.

²⁷ ¡Dios ateyi se' ken yéj, iwán yéj nochi kimati te kichíwa; mamoweyimatilti nochipa iga yej kichíwa Jesucristo! Ijkónyawa'.

**Itájtōl toTēko ipan mela'tájtōl
Nahuatl, Isthmus-Mecayapan: Itájtōl toTēko ipan
mela'tájtōl New Testament**

copyright © 2016 Wycliffe Bible Translators, Inc.

Language: Nahuatl, Isthmus-Mecayapan

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

8d5b6a33-8846-5c0f-ae8f-62c94f894f7b